

La cultura da l'abazia da Son Gagl

Pitschen guid a la claustra ed a la biblioteca abaziala da renum mundial

■ L'abazia da Son Gagl ha existì sco claustra benedictina dal 791 en fin il 1805. Dapi l'onn 1983 è l'entir complex claustral registrà en il catalog dals bains culturals d'impurtanza mundiala da l'Unesco. La sala da la biblioteca, erigida en il temp dal baroc tardiv, va la sco in dals stabiliments da biblioteca ils pli represchentativs e bels da l'entir mund. L'entschatta da l'abazia da Son Gagl è stada modesta. Ella deriva da la cella d'in eremit, da l'Irlandais Gallus. Quel è arrivà enturn il 610 a Bregenz en cumpagnia da ses magister Columban, il fundatur da Luxeuil e Bobbio. Columban è prest partì cun ses cumpogns, ma Gallus era malsaun ed ha stuì restar. En il gaud d'Arbon, situà al sid dal lai da Constanza, ha Gallus fundà enturn il 612 ina cella, ed el era bainprest circumdà da discipels.

Circa 100 onns pli tard, vers il 719, ha fundà l'Aleman Otmar, educà en la citad retoromana da Cuir, ina claustra en il lieu da la fossa da Gallus. Sin iniziatiava da Carlman e Pippin è vegnida introducida la regla benedictina il 747. Già en il 9avel tschientaner era Son Gagl ina claustra impurtanta che trategneva stretgs contacts cun la curt imperiala.

Il plan da la claustra da Son Gagl

In dals stgadis conservads en l'abazia è il plan da la claustra da Son Gagl



la pli impurtanta funtauna scritta d'architettura carolingia insumma. Grazia a questa represchentaziun

idealizada e sistematisada daventa la construcziun da las claustras da quel temp bain chapibla. Il plan è vegnì disegnà circa l'onn 825 a Reichenau sin tschintg gronds fecls da pergamina cusids ensemen. Il bibliotecar claustral dal lez temp, Reginbert, l'aveva cumpletà cun legendas. Il plan represchenta la claustra ideala carolingia sin basa da las prescripziuns da refurma da Benedetg d'Aniane e da la sinoda d'Inden. El na correspunda dentant betg al complex claustral real da Son Gagl dal temp caroling, era sch'el è franc vegnì consultà per la construcziun da la baselgia abaziala suenter il 830.

Il center vital dal stabiliment idealisà furma il «clastrum», il claustrigl che organisescha en in quadrat tut ils locals impurtants per la vita interna da la cuminanza claustrala e che fixescha lur posiziun per il futur: la baselgia occupa l'ala settentrionala che sa stenda vers l'ost cun il dormitorium. L'ala meridionala vegn furmada dal refectorium e da la cuschi-



L'areal da la claustra da Son Gagl en survista.

FOTO: HANSUELI KRAPP

na e vegn cumpletada vers il vest dal tract d'economia cun ils tschalers. Il plan mussa ina sequenza da locals talmain cumpacta e bain ponderada ch'ins po strusch crair ch'el saja vegnì concepì en ina tratga per l'emprima giada. Probabilmente furma el il resultat d'ina discussiun pli vasta concernent l'architettura claustrala.

Scrittiras e scrivants

Son Gagl è daventà in center da scrittira che ha produci durant il temp medieval in grond dumber da documents d'ina qualidad excellenta. La gronda fluriziun da la miniatura songagliasa en l'epoca d'aur dal 9 e 10avel tschientaner ha gù ina lunga fasa da preparaziun. Già enturn il 770 s'ha furmada ina gruppa da scrivants, in'otra en l'emprima mesadad dal 9avel tschientaner. A l'entschatta dominava anc la tradiziun merovinga, ils manuscrits vegnivan savens ornads d'inizialas simplas, pli da rar da fins disegns a plima. L'art songagliasa sa distingua tras sia ritgezza da furmas da las inizialas; el cuntanscha sia culminaziun en la segunda mesadad dal 9avel tschientaner. Diferents manuscrits conservads en fin oz cumprovan e documenteschan il svilup successiv a questa fluriziun. In exempel è il «Psalteri da Folchart», in dals rars documents illustrads da la biblioteca clau-

strala ch'ins sa datar; el è vegnì scrit sut la regenza da l'avat Hartmut (872–883). El sa basa sin la tradiziun dals «Codices purpurei» dal temp antic tardiv. La pergamina n'era dentant betg vegnida sfunsada en in bogn da purpur, mabain tractada cun il surrogat dal purpur duvrà en la regiun, il «folium».

La pli veglia perditga rumantscha en scrit

Da muntada speziala per il rumantsch è in'emprova da plima en in codex da la claustra da Son Gagl che sa chatta oz a Würzburg. I sa tracta da la pli veglia perditga rumantscha en scrit insumma. Il codex sco tal datescha da la segunda mesadad dal 10avel tschientaner. Pauc pli tard ha in auter maun nudà tranter in pèr pèr or da l'Evangeli da s. Matteus e l'entschatta da l'Evangeli da s. Gion la construcziun sequenta, in'emprova da scrittira en il linguatg matern: «Diderros ne habe diege muscha.» Ils linguists èn generalmain da l'opiniun che quest text saja rumantsch. Ma tge pudess muntar questa frasa «rumantscha»?

Ils texts latins avant e suenter questa frasa laschan constatar che l'autur ha tschertas fadias cun il latin classic. Forsa la lavur d'in scolari? Diderro po esser il num Diderot/Desiderius. Quel era enconuscent tras la veneraziun da las reli-

quias da Desiderius da Vienne, mort l'onn 610, venerà a Son Gagl, a Faveras ed a Sagogn. «Betg avair mustgas da far insatge» munta oz en rumantsch «betg avair gust u plaschair». N'ha Diderro (in scolari en arrest?) betg mustgas da copiar sia lavur? U sa tracti tar in «ne» dal text d'in precursor da la furma valladra «eu n'ha»? Alura pudess il text signifitgar «Diderro ha da quai diesch mustgas», q.v.d. «na gudogna (bunamain?) nagut cun questa lavur». Il text è memia curt per sclerir il misteri. Igl è pussaivel ch'il scrivant da la claustra da Son Gagl deriva da Faveras u dal territori grischun.

Il stadi claustral da la fin dal temp medieval

Vers la fin dal temp medieval era sa diminuida successivamain l'impurtanza da l'abazia da Son Gagl. La claustra era daventada ina «residenza da nobels» (Vadian) cun be anc paucs muntgs. En il context istoric n'è questa situaziun betg sorprendenta, ed ella ha franc insatge da far cun las midadas da las cundiziuns socialas ed economicas. A la sava dal temp modern èsi dentant reussì a l'avat Ulrich Rösch (1463–1491) da manar ad ina nova fluriziun la claustra ch'era da quel temp en ina situaziun fitg precara. L'avat univa en sai l'abilitad politica e duns d'administraziun. Igl è stà el a crear il sta-

di claustral modern da Son Gagl tranter il Lai da Constanza e Wil, ad acquistar il 1468 il contadi da Toggenburg ed a se-girar e schlargiar ils dretgs politics da l'abazia. En la sumbriva da l'abazia s'ha dentant er sviluppada ina citad cun pli e pli gronda impurtanza economica, grazia a sia producziun da taila ch'ella vendeva en quasi tut l'Europa. A questa expansiun economica correspundeva in'indipendenza creschenta da la citad visavi l'abazia, quai ch'ha manà en il 15avel tschientaner era a l'autonomia politica da la citad.

La prinzi-abazia barocca e ses declin

Suenter la refurmaziun ch'ha chaschunà la secularisaziun temporara da l'abazia, han ins stuì entschaiver danovamain. I sa tractava da sclerir las relaziuns confessiunales e da consolidar las structuradas politicas. Prest s'ha stabilida ina refurma da la vita religiosa en la claustra e da la pastoraziun en las numerusas pravendas claustrales sin territori songagliasi. Plaun a plaun s'ha furmada ina nova perioda da fluriziun da l'abazia ch'ha marcà decisivamain il 17- e 18avel tschientaner. Quest'epoca è anc oz preschenta en ils edifizis mantegnids dal district claustral (registrads dapi il 1983 en il catalog dals bains culturals d'impurtanza mundiala da l'Unesco). Uschia preschenta il district odiern da la claustra da Son Gagl al visitader in mund cumpletamain baroc. El na chatta a prima vista strusch insatge ch'al regorda al temp medieval.

La fin da la Confederaziun suenter l'invasiun franzosa dal 1798 ha era purtà la fin andetga da l'abazia. La dissoluziun definitiva da la claustra è vegnida decretada ils 8 da matg 1805 dal Cussegl grond dal chantun da Son Gagl, stabilì il 1803 sut l'egida da Napoleun Bonaparte. Il num Son Gagl portan oz il chantun, l'investgieu e betg il davos la citad da Son Gagl. Quella furma la chapitala dal chantun Son Gagl cun bun 70 000 abitants. En fin a noss dis conservan la biblioteca claustrala ils manuscrits ed ils archivis claustrals las cartas ed ils documents administrativs da l'anteriura prinzi-abazia da Son Gagl.

La preschentaaziun:

Archiv claustral da Son Gagl. La cultura da l'abazia da Son Gagl. In'introducziun a l'exposiziun. Son Gagl 1996.

Dapli infurmaziuns:

www.chatta.ch/?hiid=945
www.chatta.ch



Il plan idealisà da la claustra da Son Gagl, disegnà circa l'onn 825.



L'enconuscenta sala barocca da la biblioteca claustrala.



Frontispizi dal «codex Sangallensis 53 (enturn 895).